

**Ўзбекистон Республикаси Жиноят-ижроия кодексига қуйидагича  
ўзгартириш ва қўшимчалар киритиш таклиф этилади:**

**1. Кодекснинг 12-моддаси** маҳкумларнинг виждон эркинлигини таъминлашга бағишланган бўлиб, ушбу модданинг 2-қисмида “Озодликдан маҳрум қилиш тарикасидаги жазони ўтаётган шахслар хузурига, уларнинг илтимосига кўра, белгиланган тартибда рўйхатдан ўтган диний бирлашмаларнинг руҳонийлари таклиф этилади” деб кўрсатилган.

Маълумки, Ислом динида ҳамда ислом динига алоқадор ташкилотларда руҳоний лавозими йўқ бўлиб, Ислом динида ҳаттоки ушбу сўз ишлатилмайди. Шу сабабли ушбу 12-модданинг 2-қисмидаги “**руҳонийлари**” сўзи “**вакиллари**” деб ўзгартирилиши лозим бўлади.

Шунингдек, Ўзбекистон Республикаси “Виждон эркинлиги ва диний ташкилотлар тўғрисида”ги қонуни 9-моддаси 1-қисмида “Диний ташкилотларнинг марказий бошқарув органлари руҳонийлар ва ўзларига зарур бўлган диний ходимлар тайёрлаш учун диний ўқув юртлари тузишга ҳақли” деган жумлани юқорида қайд этилганлардан келиб чикиб “Диний ташкилотларнинг марказий бошқарув органлари ўзларига зарур бўлган диний ходимлар тайёрлаш учун диний ўқув юртлари тузишга ҳақли” деб ўзгартириш таклиф этилади.

**2. Кодекснинг 18-моддаси** талабларига кўра, давлат ҳокимияти ва бошқарув органларининг мансабдор шахслари, оммавий ахборот воситалари вакиллари ва бошқа шахслар жазони ижро этувчи муассасалар ва органларга кириш ҳуқуқига эга.

Шунингдек, ушбу модданинг 2-қисмида, Ўзбекистон Республикаси Олий Мажлисининг Инсон ҳуқуқлари бўйича вакили (омбудсман) ва Ўзбекистон Республикаси Президенти ҳузуридаги Тадбиркорлик субъектларининг ҳуқуқлари ва қонуний манфаатларини ҳимоя қилиш бўйича вакил шикоятларни кўриб чиқиш, шунингдек фуқароларнинг ҳуқуқлари, эркинликлари ва қонуний манфаатлари бузилганлиги ҳолларини ўз ташаббуси билан текшириш чоғида жазони ижро этиш муассасаларига монеликсиз кириш ҳуқуқига эга эканлиги белгилаб қўйилган.

Ўзбекистон Республикаси Президентининг 10.12.2018 йилдаги “Инсон ҳуқуқлари бўйича Ўзбекистон Республикаси Миллий маркази фаолиятини такомиллаштириш тўғрисида”ги ПҚ-4056 сон қарори билан тасдиқланган “Инсон ҳуқуқлари бўйича Ўзбекистон Республикаси Миллий маркази тўғрисида”ги Низомнинг 12-бандига кўра, Миллий марказга жазони ижро этиш муассасаларига, қамокда сақлаш жойларига ва махсус қабулхоналарга монеликсиз кириш; давлат органлари, ҳуқуқни муҳофаза қилиш тузилмалари, шу жумладан жазони ижро этиш муассасалари,

илмий ва таълим муассасалари ҳамда бошқа тузилмаларда инсон ҳуқуқларини таъминлаш бўйича фаолият амалиётини жойларда бевосита ўрганиш ҳуқуқи берилган.

Қайд этилганлардан келиб чиқиб, кодекснинг 18-моддасига ПҚ-4056 қарори талабларидан келиб чиқиб, Инсон ҳуқуқлари бўйича Ўзбекистон Республикаси Миллий маркази масъул ходимларининг жазони ижро этиш муассасаларига, қамокда сақлаш жойларига ва махсус қабулхоналарга монеликсиз кириши ҳамда ушбу тузилмаларда инсон ҳуқуқларини таъминлаш бўйича фаолият амалиётини ўрганиш ҳуқуқлари тўғрисидаги 3-қисм киритиш, 18-модданинг мавжуд 3-4 қисмларини тегишинча 4-5 қисмлар деб ўзгартириш таклиф этилади.

**Инсон ҳуқуқлари бўйича  
Ўзбекистон Республикаси  
Миллий маркази бўлим бошлиғи**



**О.Қ.Норбоев**